

Naqqiut

Siunnersuut 13. august 2019-imeersaq taarserpaa

Tungavilersuut

Saqqummiussissutip kalaallisoortani qulequtaa kiisalu naqinnerliukkat aaqpinneqarput.

Uunga siunnersuut: Inuussutissat pillugit Inatsisartut inatsisaat nr. xx, xx. xxx 2019-imeersaq

(Aalisarnermut, Piniarnermut Nunalerinermullu Naalakkersuisoq)

Saqqummiussissut

(Aalisarnermut, Piniarnermut Nunalerinermullu Naalakkersuisoq)

Siullermeerinnineq

Naalakkersuisut sinnerlugit nerisassat pillugit Inatsisartut inatsisissaattut siunnersuut saqqummiuppara. Nerisassanut inatsisissatut siunnersuummi pingaarnertut siunertaavoq paasiuminartumik, ullutsinnut naleqquttumik nerisassiornerullu iluani soqutigisalinnut tamanut atoruminartumik sinaakkusiornissaq.

Maannakkut inuussutissanik nersutillu nappaataannik inunnut tunillaassorsinnaasunik nakkutilliineq pillugu Inatsisartut peqqussutaat 1993-imi atuutsinneqalerpoq, tamatumalu kingorna peqqussut marloriarluni allanngortinneqarnera akuerineqarnikuuvoq, kingullerlu 2001-imi pisimavoq. Peqqussutit nutaanngitsut kiisalu Uumasut nakorsaqaarfik Inuussutissalerinermullu suliassaqaarfik siunissami akisussaaffiginialerusunneratigut, inatsisissatut siunnersuut inuussutissarsiutitigut inuussutissarsiutinilu nioqquteqarsinnaanermi qulakkeerinnissinnaaneq anguniarlugu Kalaallit Nunaanni inatsisini nutarsarneqartariaqarsorisanut nutarsaaneruvoq.

Siunertaavoq siunnersuutikkut inuussutissarsiorfiit atuisullu qulakkeerneqarnissaannut sinaakutissiorneq, taassumalu saniatigut aamma inuussutissarsiornerup iluani sukkasuumik ineriartorfiusumi eqaatsumik malittarisassiortoqarpoq.

Uumasunut Nakorsaqaarfik Inuussutissanullu oqartussaqaarfik suli oqartussaqaarfiuvoq Kalaallit Nunaanni Danmarkillu akornanni avinneqarsimavoq, politikikkullu kissaatigineqarpoq siunissami oqartussaqaarfik tamakkiisumik kalaallinit tiguneqarumaartoq. Tamannalu piviusunngussappat pisariaqartinneqarpoq inuussutissarsiornerup iluani akisussaaffeqalernerup kingunerisaanik unammilligassat takkussinnaasut pillugit Kalaallit Nunaanni inatsisitigut sinaakkusiilluarsimanissaq. Siunertaavortaaq ingerlatsilersinnaasunut nutaanut sulianik aallartitsisinnaanerup ajornannginnerulersinnissaa, taamaasiornikkullu inuussutissarsioriaatsit nutaat periarfissaallisapput niuerfinnilu siammarterneqarsinnaalissallutik.

Siunnersuummi uani periuseq utertuortoq tassaavoq sianigalugu ingerlatseriaatsip malinneqarnissaa. Naalakkersuisut peqqissutsikkut illersuiniarneri qaffasissut malinneqarnissaat kissaatigaat arlaatigullu inuunermi peqqissutsikkulluunniit navianartorsiorititsisinnaanermi aammalu ilisimatuussutsikkut nalorninartorsiornermi

sianiginninniarnermi ingerlatseriaaseq malinneqartassaaq imaluunniit arlaatigut iliuseqartoqartariaqartassalluni.

Siunnersuut inuussutissarsiutinik suliaqartumiit atuisumut apuunneqarnissaata tungaanut periutsip inuussutissarsioriaatsip iluani inatsisiliortoqarnissaatigut kissaatigineqarsimasumik naammassinninneruvoq, tassuunalu inuussutissalerinermik suliaqartut naapertuuttunik qulakkeerneqassallutik. Taassumalu saniatigut siunnersuutip siunertaraa innuttaasunut oqartussa qarfinnullu paasiuminartunik piffissamullu tulluurtumik inatsiseqalernissaa, kiisalu maannakkut Inuussutissanik nersutillu nappaataannik inunnt tunillaassorsinnaasunut inatsimmi paasiuminaatsut amigaatigineqartullu aaqqiiviginialugit.

Naggasiullugu inatsisissatut siunnersuummut oqaaseqaatinullu innersuuppasi.

Taama oqaaseqarlunga siunnersuutip Inatsisartuni suliarineqarnissaanut ingerlatitseqqippunga.

Qujanaq.